

### **Pressmitdelen Funklock stoppen!, 16.06.2021**

#### **Funklock stoppen! – Plattdüütsche Acht-Länner-Konferenz maakt niege Nettsiet künnig**

Se schullen sik nich alleen op dat Thema Höörfunk spitzen, „plattdüütsch Feernsehn höört ok dorto“, see de Sleswig-Holsteenske Landdagspräsident Klaus Schlie to Anfang vun de 2. Funklock stoppen!“-Konferenz un wünsch de Deelnemers veel Erfolg. „Funklock stoppen!“ is de Kampagne, mit de Organisatschonen ut acht Bunnsländer vun NRW bet Brannenborg en öffentlich-rechtliche plattdüütsche Medienplattfoorm föddert.

Bi dat Onlinedrepen verleden Dingsdag, 15. Junimaand 2021, geev dat för de üm un bi 40 plattdüütschen Repräsentanten Vördrääg to hören vun de Minnerheidenexpertinnen Bogna Koreng un Sonja Wolf.

De enkelte Spreker, de Sprekergrupp un de hele Sellschop – düsse drie mööt tohoopfinden, dormit en Idee wükdlich warrn kann. So hett de Sozialwetenschoplensch Sonja Wolf vun´t European Council for Minority Issues in Flensburg den Prozess beschreven, den ok de Plattdüütschen nu vör sik hebbt, siet se opstahn sünd un verlangt, wat in anner europäasche Länner al lang begäng is: Öffentlich-rechtliche Radioprogrammen ok för de lütten Spraken. „Empowerment“ nööm Fru Wolf den Prozess, in den Minnerheiden sik bewusst warrt över dat, wat se bruukt un wat ehr Recht is, för sik to föddern.

En modeern Lütte-Spraken-Programm maakt dat för de Sprekers mööglich, dat se an elkeen Steed in de Welt ehr Spraak hören köönt un verbetert dat Bild, wat de Spraak na buten hen afgifft. Dat see de Studioleitersch vun´n MDR in Bautzen, Bogna Koreng in ehren Vördrag. Se hett ok dat böversoorbsche Programm serbski rozhlos bi MDR Sachsen opbuut. Man to so en Programm höört, dat de Sprekergrupp sülvst sik aktiv bedeligt un dat de jungen Lüüd för de Medien begeistert warrt, so Koreng.

Christiane Ehlers vun´t Nedderdüütschsekretariat is een vun de Lüüd achter „Funklock stoppen!“ Se hett gegen Enn vun de Konferenz dat niege Logo präsentiert, wat Ünnerstütters nu anföddern köönt bi Nedderdüütschsekretariat un Sleswig-Holsteenschen Heimatbund. Opto maak se de niege Nettsiet künnig. Op [www.funklockstoppen.de](http://www.funklockstoppen.de) steiht vun nu af an, wat dat mit dat Verlangen na en öffentlich-rechtlich plattdüütsch Radio op sik hett un wokeen dat Anliggen ünnerstütten deit.